

四庫全書

子部

欽定四庫全書

子部

冊府元龜卷九百

三十八至
四十

詳校官中書臣賈鉞

侍讀臣孫球覆勘

總校官庶吉士臣何思鈞

校對官庶吉士臣毛鳳儀

謄錄監生臣桑英

欽定四庫全書

冊府元龜卷九百三十八

宋 王欽若等撰

總錄部

姦佞第二

唐封倫字德彝少聰明多狡筭頗涉書史初仕隋釋
褐為州都俄以蔭補左翼衛外如謹厚內殊險詖當官
處政必協姦謀因從楊素行軍以諂事素甚異之遂妻
之以從妹後素受委營仁壽宮又引德彝為土工監及

文帝幸宮所見制度侈麗大怒曰楊素不誠矣殫百姓之力雕飾離宮為吾結怨於天下也素惶恐慮將獲譴德彝曰公當勿憂待皇后至必有恩詔明日果召素入對獨孤后勞之曰公大用意知吾夫妻年老無以娛心盛飾此宮實為孝順素退問德彝曰卿何以知之對曰至尊性儉故視見而怒然雅聽后言皇后婦人也惟麗是好后心既悅聖慮必移所以知耳素歎服曰揣摩之才非吾所及也素負勲恃貴多所陵侮唯激賞德彝因

撫其牀曰封郎後時必當據吾此座

李安儼初事隱太子及太子敗率兵拒戰太宗以為忠於所事故任用之至中郎將典屯兵於北門甚見親委其弟思暕為太子通事舍人貞觀中太子承乾因思暕以致賂安儼亦深自託於承乾嘗言於太宗曰皇太子及諸王陛下處置未為得所且太子國之本也伏願深其思慮以安天下之情太宗曰我識卿意我兒雖患脚猶為長嫡豈可捨嫡立庶乎安儼以白承乾大喜又令

左右遺以黃金

趙元楷武德中為交河道行軍總管時侯君集為元帥馬病蟲顛元楷以脂濡其膿而輿之以諛君集為御史所劾左遷括州刺史

姚璿則天朝為桂州都督府長史時則天雅好符瑞璿至嶺南訪諸山川草樹其名號有武字者皆以為上應國姓列奏其事則天大悅召拜天官侍郎

宗秦客者蒲州河東人則天從父姊之子也垂拱中潛

動則天革命稱帝繇是累遷內史

李思文為司僕少卿垂拱元年表請改姓武氏則天許之

迦葉志忠中宗朝右驍衛將軍知太史事志忠上表曰
昔高祖未受命時天下歌桃李子太宗未受命天下歌
秦王破陣高宗未受命天下歌堂堂天后未受命天下
歌武媚娘伏惟應天皇帝未受命時天下歌英王石州
順天皇后未受命時歌桑條韋也女六合之內齊首蹠

足應四時八節之會歌舞同歡豈與夫簫韶九成百獸
率舞同年而語哉伏惟皇后降帝女之精合為國母主
蠶桑之事以安天下后妃之德於斯為盛謹進桑條歌
十二篇伏請宣布中外進入樂府皇后先蠶之事以享
宗廟帝悅而許之時賜志忠莊一區雜綵七百段太常
少卿鄭愔又引而申之播於舞詠亦受厚賞兵部尚書
楚客又諷補闕趙延禧表陳符命解桑條以為十八之
符請頒示天下編諸史冊帝大悅

鄭愔諂事張易之兄弟歷殿中侍御史易之伏誅愔左授宣州叅軍尋坐贓逃歸東都諂事武三思及韋氏悖逆庶人歷遷吏部侍郎

李繁宰相泌之子泌為相薦夏縣處士北平陽城為諫議大夫城深德泌及歿戶部尚書裴延齡巧佞有恩竊弄威權朝臣無不側目城忠正之士尤忿嫉之一日盡疏其過欲密論奏以繁故人子謂可親信遂示其疏草兼請繁繕寫繁既寫訖悉能記之其夕乃徑詣延齡具

述其事延齡聞之卽時請對盡以城章中所欲論告節目一一自解及城疏入德宗返以為妄不為之省

李訓本名仲言宰相揆之族孫訓從父逢吉為宰相以訓陰險善計事極親厚之後竟以武釗之獄流于嶺表數歲會赦還丁母憂居于東雒時逢吉為留守思復柄用逢吉雖暮年以怨裴度故嘗憤鬱不快每召訓游說訓揣知逢吉意即以竒計動之且言已與鄭注善逢吉聽其言因攘袂奮臂謂訓即日能就其謀因遺訓金帛

數百萬訓居喪服中持之西來因得以厚自交結遂因鄭注委質于中尉王守澄

鄭注絳州翼城人始以藥術游揚長安中權豪間日有知遇注者或云本姓魚冒姓鄭氏時人亦號為魚鄭及注之用事天下有水族之號焉元和十二年李愬為襄州節度使注以客詣愬愬得其秘藥因厚遇之署為節度衙推愬遷鎮徐州注從之赴職軍中利害愬往往與之參議注詭賊陰狡善探人意旨至是與愬籌畫未嘗

不暗會其機巧然挾竒任數專作威福軍府多害之時
王守澄為徐州監軍使一日以軍中之苦白于愬愬曰
彼誠如此然實竒才也將軍試召之與語苟不合意去
之未晚也愬即召注令詣監軍所守澄欲見之初尚遲
難及延坐與語機辯釋然盡中其意即延入于中堂翼
日守澄反以誠款託注於愬請全護之愬即加署注節
度巡官齒諸賓列自此注遂委身於權幸之伍矣及守
澄入總樞密當長慶寶曆之際國政多專於守澄注畫

伏夜動攘竊販賣於其間初則讒邪姦巧之徒附之以
圖進取數年之後要官權臣爭湊其門累從山東京西
諸軍歷衛左評事御史又以檢校庫部郎中兼侍御史
從昭義劉從諫軍為節度副使既陰以罪誣奏宋申錫
時之守道居正者始側目視之注有口辯機數過人賣
官鬻權積財累巨萬復能糞土金帛居京師善和里宅
通永巷重檐複壁陰召引京師不肖及四方節將豪猾
通問往來日招權利間日赴軍與守澄款昵語必移時

或通夕無寐李訓既附注以進承間遂入謁于帝時之輕浮躁進者盡趨於注矣太和九年夏自太僕卿除工部尚書翰林侍讀學士是時李訓亦居內庭二人相挾日侍帝前說帝以昇平之策帝益惑其說當是時訓注之權赫於天下內外呼吸噂沓賢不肖昇黜混亂而注自謂弛張變化一時無比然識者知其所挾非正必能致亂于時及京師急變注自岐陽將親兵五百餘人至闕下行至扶風聞李訓等敗走注即歸鎮憂感不安將

欲舉兵詣闕監軍使張仲清已得密詔乃給注而召之
注恃其兵衛即云就召監軍使伏勇卒以待之注至坐
定斬其首持以號令注之親兵乃自散逸盡殺其家屬
無孑遺初未得注京師憂恐至是人人慶快焉

王叔文初自順宗為太子時以碁進太子又學書於王
伾二人俱待詔翰林數侍太子碁叔文譎詭多計順宗
嘗與諸侍讀及叔文等論時政及宮市事順宗曰寡人
方欲極言之衆皆稱贊獨叔文無言既退順宗獨自留

叔文謂曰向者君奚獨無言豈有意耶叔文曰叔文幸蒙太子有所見教不以聞太子職當視膳問安不宜及外事陛下在位久如疑太子收人心何以自解順宗大驚因涕泣曰非先生寡人無繇知此遂大愛幸與王伾兩人相依附俱出入東宮

韓中僕射臯之從父弟克狂喜酒博以罪斥逐元和中量移宣州管内縣尉會赦得還觀察使元錫遂以疏薦之中陰結內倖用事者因為錫通達錫厚輸其貨謀領

大權未幾果以詔徵既非公望又陰迹稍露至闕累召
對於延英於是諫官及在位者屢以疏論竟沮其謀復
舊任雖未加黜責人亦賀帝聽允公議

後梁張禕以司徒致仕庶人友珪偽鳳歷元年禕著南
郊賦一篇來獻以金帛賜之

後唐蘇循在唐為禮部尚書首贊梁祖受九錫又其子
楷駁昭宗謚號敬翔惡其為人父子放歸田里乃寓居
河中積年會莊宗將副人望求唐室舊臣遣使自河中

徵赴鄴都初監軍使張承業惜經國之費未欲上議即
尊之事諸將賓僚無敢言者及循至鄴入衙城拜魏帥
廳謂之拜殿翌日獻畫日筆三十管冀悅帝心其諂進
如此承業聞之怒會河東節度副使盧汝弼卒因以代
之明年春偶食蜜雪而卒

陳又為給事中充樞密直學士性姦險好為陰計始在
梁事張漢傑滅宗莊宗時佐郭崇韜伐蜀而郭又覆族
至是朱宏昭拔用之不兩月宏昭及禍其時僻政拙謀

而又有力焉

張文禮初鎮州大將也自燕歸於王鎔察鎔不親政事
遂曲事當權者以求銜達每對鎔自言有將才孫吳韓
白莫已匹也鎔賞其言大悅為小校給遺甚厚與姓為
義男改名德明自是調發兵馬每將軍令

何澤為太僕少卿致仕長興四年八月自河陽遣婢宜
子投匭上書請立秦王從榮為皇太子澤前任吏部郎
中舊曾與宰相趙鳳使府同院為判官因是舊數泣告

於鳳求為給諫鳳怒其躁佞除授秘書少監堂吏有姓
何者私報澤澤卽稱新授秘書少監臣澤上章訴屈大
畧云臣伏尋近例自郎中拜給諫者卽崔懋張延雍皆
自郎官拜諫議况臣在郎署粗有勤勞無罪左遷有同
排擯事下中書宰臣執奏何澤新命未下便敢稱謂開
天不知澤何處授此官位誣弄朝綱法當不敬繇是命
太僕少卿致仕退居河陽澤性好內侍婢十餘凡公私
請託多令諸婢出入至於掌關待客輒無形迹既久退

居心常鬱鬱年七十餘求進未已既見從榮位望隆盛
帝又多病自素與執政私憾欲報仇於一時即令婢宜
子詣闕投匭上章大畧曰立儲之事人所難言內外大
臣不忍輕議臣所以冒死以聞又云臣前在班行不求
致仕乃是宰執抑臣屏退所以不盡臣才明宗覽澤表
不悅私謂近臣曰羣臣欲立儲君吾自歸河東養老雖
然不得已令大臣商議大臣聞帝所言不敢可否即議
加從榮大元帥之命俄而致從榮不軌之變繇澤啓其

弊端也

段凝梁末為招討使乞降累授兗州節度使初謁見莊宗因伶人景進通貨於宮掖又天性姦佞巧言飾智善候人意契丹寇幽州命宣徽使李紹宏監護軍以禦北虜凝與董璋成瓦橋關凝巧事紹宏紹宏嘗乘間奏凝蓋世奇才可以大任屢請以兵柄委之郭崇韜奏曰凝亡國敗軍之將姦諂難狀不可信也凝在藩鎮私用庫物數萬計有司促償中旨貫其負

孔循幼孤流落洛都市人李讓畜之然性黠慧讓以軍功為朱溫所寵溫以讓為子號朱友讓循又姓朱循漸長成尤穎悟朱溫選為綱紀溫之乳媪掌事者而循親之乳媪為之義母媪之外夫趙氏循又隨媪夫姓曰趙名殷衡昭宗自鳳翔還京左右前後皆朱溫之腹心時殷衡年十七八為宣徽副使及東遷雒都殷衡與蔣玄暉張廷範等受朱溫密旨同弒昭宗輝王即位蔣玄暉為樞密使因事與殷衡不相協時朱溫欲受九錫即禪

輝王位朱溫在宿州行營玄暉自往咨謀其事稍遲留
朱溫怒玄暉會殷衡至溫問不行九錫之繇殷衡曰玄
暉與張廷範同謀恢復唐家向何皇后前同立盟誓以
此故不欲王速行九錫溫怒是日遣使與殷衡同來遂
殺何皇后及蔣玄暉張廷範柳璨等十餘族殷衡以功
為權樞密副使朱溫之世掌要密權莊宗未知汴州軍
州事會明宗自鄴城南趨夷門莊宗東出汜水循西則
奉表迎奉亦遣人北輸密款

張遵誨為客省使明宗將有事于南郊為脩儀仗法物使初遵誨以歷位尹正與安重誨素亦相欵心有望於節鉞重誨嘗視法物於脩行寺因過遵誨之第遵誨於中堂出女妓珍幣以為壽有彈箏妓尤善欲以奉重誨時樞密學士史圭閻至等在席素惡遵誨之阿諛有不平之色重誨曰吾自有妓媵不煩掠美於人自是左右益言其短及郊禋畢以為絳州刺史鬱鬱不樂離京之日白衣乘馬於隼旗之下至郡無幾而卒

石知訥為殿中少監本梁時之走吏也以姦險自進漸
廁簪組夏魯竒辟為河陽節判移任許州亦佐之及魯
竒權知襄州知訥為殿中少監尚居于許下朱守殷叛
知訥走人勸魯竒棄其城而歸許州漢上戍兵幾將為
亂朝廷知之詰其所自魯竒沮之而知訥貶憲州司戶
尋與溫韜同詔賜死

怨刺

古者行人之官每歲孟春振木鐸徇于路采取怨刺之

詩以聞于天子故五子之歌風雅之什率多怨誹風刺
之言也騷人已來作者間出其或含忠履潔遭罹讒構
越世高蹈捨去榮祿痛國政之頽廢嫉時風之澆競因
廢滯而形賦詠發憤懣而譏公卿至於遷斥流落窮愁
困辱詞人才子往往而有何嘗不撫靈均之遐韻襲長
沙之逸軌託文以示諷因言以見志斯可哀也已若乃
負釁而忘悔長傲而自棄鮮克內省形於詆訾傳所謂
居下流而訕上者乃仲尼之所惡焉

夏王太康失邦

啟子也盤于遊田不恤民事為羿所逐不得反國

昆弟五人須

于雒汭作五子之歌

太康五弟與其母待太康於雒水之北怨其不反故作歌

曰太

康尸位以逸豫

尸主也主以尊位為逸豫不勤

滅厥德黎民咸貳

君喪其德

則衆民皆戒其心矣

乃盤遊無度

盤樂遊逸無法度

畋于有雒之表十旬

弗反

雒水之表水之南十日曰甸田獵過百日不還

有窮后羿因民弗忍距于

河有窮國名羿諸侯名距太康於河不得入國遂廢之

厥弟五人御其母以從侍

也言從畋 儀于雒之汭五子咸怨

待太康怨其久畋失國

述大禹之戒

以作歌

述循也歌以叙怨

其一曰皇祖有訓民可近不可下

君皇

也君祖禹有訓戒近謂親之下謂失分

民惟邦本本固邦寧

言人君當固民以安國

子視天下愚夫愚婦一能勝予

言能畏敬小民所以得衆心

一人三

失怨豈在明不見是圖

三失過非一也不見是謀備其微

予臨兆民慄

乎若朽索之馭六馬

十萬曰億十億曰兆言多慄危貌朽腐也腐索馭六馬言危懼甚

為人上者柰何不敬

能敬則不驕在上不驕則高而不危

其二曰訓有之

內作色荒外作禽荒

作為也迷亂曰荒色女色禽鳥獸

甘酒嗜音峻宇

彫牆

甘嗜無厭足峻高大彫飾盡

有一于此未或不亡

此二者棄德之君必有其

一有一必亡

其三曰惟彼陶唐有此冀方

陶唐帝堯氏都冀州統天

方下四今失厥道亂其紀綱乃底滅亡

言失堯之道亂其法制自致滅亡

其四曰明明我祖萬邦之君有典有則貽厥子孫

君萬國為

天子典謂經籍則法貽遺也言仁及後世

關石和鈞王府則有荒墜厥緒覆

宗絕祀

金鐵曰石供民器用通之使和平則官民足言古制存而太康失其業以取亡

其五曰

嗚呼曷歸予懷之悲

曷何也言思而悲

萬姓仇予予將疇依

仇怨

也言當依誰以復國乎

鬱陶乎予心顏厚有忸怩

鬱陶言哀思也顏厚色愧忸怩

心慙慙愧於仁人賢士

弗慎厥德雖悔可追

言人君行已不慎其德以速滅敗雖欲悔

其可追及乎言無益

周伯夷叔齊孤竹君之二子父卒兄弟讓位歸於周武

王已平殷亂天下宗周而伯夷叔齊耻之義不食周粟

隱于首陽山

首陽山在河東蒲坂華山之北河曲之中

采薇而食之及餓而

死作歌曰登彼西山兮采其薇矣以暴易暴兮不知其非矣神農虞夏忽焉沒兮我安適歸矣吁嗟徂兮命之衰矣遂餓死於首陽山

召穆公

康公後也

作民勞五章刺厲王也

厲王時賦斂重數繇役煩多人民勞

苦輕為姦宄彊凌弱衆暴寡作寇害故穆公以刺之

又作蕩八章傷周室大壞也

厲王無道天下蕩蕩無網紀文章故作此詩也

允伯

允國伯爵周公之裔也
汲郡共縣東南有允城

為王卿士作板八章刺厲

王也

其詩曰上帝板板下民卒瘁出話不然為猶不遠
板板反也瘁病也話善言也猶道也言王為政反

先王與天之道天下之民
皆病其出善言而不行也

芮伯

畿內諸侯

字良夫為王卿士作桑柔十六章刺厲王也

其詩曰萋彼桑柔其下侯甸將采其劉瘼此下民甸言
陰均也劉爆燥而希也瘼病也謂桑之柔濡其葉萋然
茂盛人庇陰其下者均得其所已將采之
則爆燥而跣人息其下則病於爆燥也

衛武公作抑十二章刺厲王亦以自警也

其詩曰抑抑
威儀維德之

隅抑抑密也隅廉也

又作賓之初筵五章刺時也幽王荒廢媒近

小人飲酒無度天下化之君臣上下沈湎淫液武公既

入而作是詩也

其詩曰彼醉不臧不醉反耻言彼醉則已不善未醉者耻罰之

家父為周大夫

家父字也失其姓

作南山十章刺幽王也

其詩曰赫

赫師尹不平謂何又曰昊天不平我王不寧言太師尹氏為政不平使我王不得安寧也

允伯為王大夫

臣欽若等曰前允伯為卿士此為大夫蓋二人也皆失其名

作瞻印

七章刺幽王大壞也

其詩曰瞻印昊天則不我惠言幽王為政不愛我下民也

又作

召旻七章刺幽王大壞也旻閔也閔天下無如召公之

臣也

孟子寺人也作巷伯七章刺幽王也寺人傷於讒故作

是詩也

巷伯奄官寺人內小臣也奄官掌王后之命於宮中為近故謂之巷伯與寺人之官相近讒人

諧寺人寺人又傷其將及巷伯故以名篇

譚大夫

失其姓名

作大東七章刺亂也東國困於役而傷於

財

譚國在東故其大夫尤苦征役之事者也

作是詩以告病焉

蘇公作何人斯八章刺暴公也

蘇暴皆畿內國名

暴公為卿士

而諧蘇公焉故蘇公作是詩以絕之

其詩曰伊誰云從維暴之云云言也

謂譖我也言從誰生
乎乃暴公所言也

鄭公子素作清人三章刺文公也高克好利而不顧其

君文公惡而欲遠之不能使高克將兵而禦狄于竟

臣欽

若等曰高克鄭大夫也
清者高克所師之邑名

陳其師旅翱翔河上久而不召

衆散而歸高克奔陳公子素惡高克進之不以禮文公
退之不以道危國亡師之本故作是詩也

介子推晉人從文公出亡周流天下文公反國介子推
不肯受賞自為賦詩曰有龍于飛周徧天下五虵從之

為之承輔

承佐也輔維也龍君也以喻文公也臣也喻趙衰孤偃賈佗魏犇介子推也故曰五蛇也

龍反其鄉得其處所四蛇從之得其露雨

露雨膏澤也

一蛇

羞之槁死於中野懸書文公門而伏於山下文公聞之

曰善此必介子推也避舍變服令士庶人曰有能得介

子推者爵上卿田百萬

百萬畝

或遇之山中有釜蓋登問

焉曰請問介子推安在應之曰夫介子推苟不欲見而欲隱吾獨焉知之遂背而行終身不見

申叔儀吳大夫魯哀公會晉侯及吳子於黃池申叔儀

乞糧於公孫有山氏

公孫有山魯大夫舊相識

曰佩玉繫兮余無所

繫之

繫然服飾備也已獨無以繫佩言吳王不恤下

旨酒一盛兮余與褐之父

睨之

一盛一器也睨視也褐寒賤之人言俱得視不得飲

楚屈原名平為楚懷王左徒上官大夫與之同列爭寵
讒之王怒而疏屈平屈平疾王聽之不聰也讒諂之蔽
明也邪曲之害公也方正之不容也故憂愁幽思作離
騷離騷者猶離憂也夫天者人之始也父母者人之本
也人窮則反本故勞苦倦極未嘗不呼天也疾痛慘怛

未嘗不呼父母也屈平正道直行竭忠盡智以事其君
讒人間之可謂窮矣信而見疑忠而被謗能無怨乎屈
平之作離騷蓋自怨生也國風好色而不淫小雅怨誹
而不亂若離騷者可謂兼之矣上稱帝嚳下道齊桓中
述湯武以刺世事明道德之廣崇治亂之條貫靡不畢
見其文約其辭微其志潔其行廉其稱文小而其指極
大舉類過而見義遠其志潔故其稱物芳其行廉故死
而不容自疎濯淖污泥之中蟬蛻於濁穢以浮游塵埃

之外不獲世之滋垢皜然泥而不滓者也

皜疎淨之貌

推此

志也雖與日月爭光可也屈原既被遷至於江濱被髮

行吟澤畔顏色憔悴形容枯槁漁父見而問之曰子非

三閭大夫歟

三閭之職掌王族三姓曰昭屈景序其譜屬率其賢良以屬國士

何故而

至此屈原曰舉世混濁而我獨清衆人皆醉而我獨醒

是以見放漁父曰夫聖人者不凝滯於物而能與世推

移舉世混濁何不隨其流而揚其波衆人皆醉何不餽

其糟而啜其醢何故懷瑾握瑜而自令見放為屈原曰

吾聞之新沐者必彈冠新浴者必振衣人又誰能以身
之察察受物之汶汶者乎蒙垢寧赴長流而葬乎江魚
腹中耳又安能以皓皓之白而蒙世之蠃黷乎乃作懷
沙之賦懷石自投汨羅以死

漢賈誼為長沙王太傅既以適去意不自得及度湘水

湘水出零陵陽海
山北流入江也

為賦以弔屈原屈原楚賢臣也被讒

放逐作離騷賦

離遭也憂動曰騷
遭憂而作此辭

其終篇曰已矣國

亡人莫我知也遂自投江而死誼追傷之因以自諭

楊惲宣帝時以光祿勳免為庶人居治產業起室宅以財自娛歲餘其友安定太守西河孫會宗與惲書諫

戒之惲答書曰家本秦也能為秦聲婦趙女也雅善鼓

瑟奴婢歌者數人酒後耳熱仰天拊缶

缶瓦器即今盆類秦人擊之以

節歌而呼烏烏其詩云田彼南山蕪穢不治種一頃豆落

而為其人生行樂耳須富貴何時

山高而在陽人君之象也蕪穢不治言朝

廷之荒亂也一頃百畝以喻百官也言豆者真實之物常在困倉零落在野喻已見放棄也其豆莖也曲而不

直言朝臣皆諂諛也須待也

後漢梁竦字叔敬少習孟氏易弱冠能教授後坐兄松事與弟恭俱徙九真既徂南土歷江湖濟沅湘感悼子胥屈原以非辜沈身乃作悼騷賦繫玄石而沉之

應奉為司隸校尉黨事起

臣欽若等曰桓帝時牢脩上書誣告李膺等部黨奉在黨

中以疾自退追愍屈原因以自傷著感騷三十篇數十

萬言

趙壹漢陽西縣人也恃才倨傲為鄉黨所擯作刺世疾邪賦以舒其怨憤

晉魯褒字元道南陽人好學多聞以貧素自立元康之
後紀綱大壞褒傷時之貪鄙乃隱姓名而著錢神論以
刺之其畧曰錢之為體有乾坤之象內則其方外則其
圓其積如山其流如川動靜有時行藏有節市井便易
不患耗折難折象壽不匱象道故能長久為世神寶親
之如兄字曰孔方失之則貧弱得之則富昌無翼而飛
不足而走解嚴毅之顏開難發之口錢多者處前錢少
者居後處前者為君長居後者為臣僕君長者豐衍而

有餘臣僕者窮竭而不足詩云哿矣富人哀此甿獨錢
之為言泉也無遠不往無幽不至京邑衣冠疲勞講肄
厭聞清談對之睡寐見我家兄莫不驚視錢之所祐吉
無不利何必讀書然後富貴昔呂公欣悅於空版漢祖
克之於贏二文君解布裳而被錦繡相如乘高蓋而解
犢鼻官尊名顯皆錢所致空版致虛而况有寔贏二雖
少以致親密繇此論之謂為神物無德而尊無勢而熱
排金門入紫闥危可使安死可使活貴可使賤生可使

殺是故忿爭非錢不勝幽滯非錢不拔怨讐非錢不解
令聞非錢不發雖中朱衣當途之士愛我家兄皆無已
已執我之手抱我終始不計優劣不論年紀賓客輻輳
門常如市諺曰錢無耳可使鬼凡今之人惟錢而已故
曰軍無財士不來軍無賞士不往仕無中人不如歸田
雖有中人而無家兄不異無翼而欲飛無足而欲行蓋
疾時者共傳其文褒不仕莫知其所終

忠帝末忠賢路
絕讒邪得路更

相薦舉天下為之反常高平王沉作釋時
論盧江杜嵩作任子春秋皆疾時之作也

會稽王道子孝武世輔政時有人為雲中詩以指斥朝廷曰相王沉醉輕出敎命捕賊千秋干豫朝政王愷守常國寶馳競荆州大度散誕難名盛德之流法護王寯仲堪仙民特有言詠東山安道執操高抗何不徵之以為朝匠荆州謂王忱也法護即王珣寯即王恭仙民即徐邈字安道戴逵字也

宋顏延之為太子中庶子時劉湛殷景仁專當要任湛恨延之言於彭城王義康出為永嘉太守延之甚怨憤

乃作五君詠以述竹林七賢山濤王戎以貴顯被黜詠
嵇康曰鸞翮有時鍛龍性誰能馴詠阮籍曰物故不可
論塗窮能無慟詠阮咸曰屢薦不入官一麾乃出守詠
劉伶曰韜精日沉飲誰知非荒宴此四句蓋自序也湛
及義康以其辭旨不遜大怒時延之已拜欲黜為遠郡
太祖與義康詔曰降延之為小邦正謂其在都邑豈動
物情罪過彰著亦士庶共悉直欲選代令思愆里閭猶
復不悛當驅往東土乃至難恕自可隨事錄治殷劉意

咸無異也以光祿勳車仲遠代之延之與仲遠世素不
協屏居閭巷不豫人間者七載

梁江革子從簡少有文情年十七作採荷調以刺何敬
容為當時所賞

後魏東阿縣公順與城陽王徽不協順疾徽聞之為蠅
賦以刺焉

崔纂字叔則博學有文才景明中自太學博士轉員外
散騎侍郎既不為時知乃著無談子論以刺焉

常景為門下錄事淹滯積歲不至顯官以蜀司馬相如
王褒嚴君平揚子雲等四賢皆有高才而無重位乃託
意以讚之其讚司馬相如曰長卿有豔才直致不羣性
鬱若春煙舉皎如秋月映遊梁雖好仁仕漢常稱病清
身非我事窮達委天命其讚王子淵曰王子挺秀質逸
氣干青雲明珠既絕俗白鵠盡驚羣才世苟不合遇否
途自分空枉碧雞命徒獻金馬文其讚嚴君平曰嚴公
體沉靜立志明霜雪味道綜微言端著演妙說才屈羅

仲口位結李強舌素尚邁金貞清標陵王徹其讚揚子
雲曰蜀江導清流揚子挹餘休含光絕後彥覃思邈前
脩世輕文不賞玄談物無求當途謝權寵置酒獨閒遊
隋盧思道字子行初仕後周為掌教上士高祖為丞相
遷武陽太守非其好也為孤鴻賦以寄其情思道自恃
才地多所陵轢繇是官塗淪滯既而又著勞生論指切
當時

劉炫以教授為務勅令事蜀王秀遷延不往秀大怒枷

送益州既而配為帳內炫因擬屈原卜居為筮塗以自
寄

冊府元龜卷九百三十八

欽定四庫全書

冊府元龜卷九百三十九 宋 王欽若等 撰

總錄部

譏誚

詩云善戲謔兮不為虐兮言君子之德有張有弛不嘗矜莊而時戲謔也故仲尼有戲耳之言左氏明耻之義士大夫出處市朝之內周旋醜夷之間以游以戲載笑載言或臨事以興譏或因人而暴謔不為患虐亦為

善矣

孟明秦大夫魯僖三十三年晉敗秦師于殽獲孟明既

釋之使陽處父以左驂贈之孟明曰三年將拜君賜

意欲

報伐

文二年孟明帥師伐晉以報殽之役戰于彭衙秦

師敗績晉人謂秦拜賜之師

以孟明言拜賜故嗤之

華元宋大夫鄭伐宋獲華元華元逃歸宋城華元為植

巡功

植將主也

城者謳曰睥其目睹其腹棄甲而復

睥出目睹大腹

棄甲謂

于思于思棄甲復來

于思多須之貌

使其驂乘謂之曰

牛則有皮犀兕尚多棄甲則那

那猶何也

役人曰從其有皮

丹漆若何

魯宣公十二年邲之戰晉人或以廣隊不能進

廣兵車

楚

人憇之脫扃

憇教也扃車上兵闌

少進馬還又憇之拔旆投衡乃

出

還便旋不進旆大旗也拔旆投衡上使不帆風差輕

曰吾不如大國之數奔也

臧紇魯大夫襄四年冬十月邾人莒人伐鄆臧紇救鄆

侵邾敗於狐貽

臧紇武仲也鄆屬魯故救之狐貽邾地魯國蕃縣東南有日台亭

國人

逆喪者皆髻魯於是乎始髻

髻麻髮合結也遭喪者多故不能備出服髻而已

國人誦之曰臧之狐裘敗我於狐貍

臧紇時服狐裘

我君小子

朱儒是使朱儒朱儒使我敗於邾

襄公幼弱故曰小子臧紇短小故曰朱儒

敗不書魯人諱之

子罕宋大夫鄭尉氏司氏之亂餘盜在宋鄭人納賂於

宋以馬與師茂師慧子罕以賊與之鄭人醢之師慧過

宋朝將私焉

私小

其相曰朝也

相師

慧曰無人焉相曰

朝也何故無人慧曰必無人焉若猶有人豈以其千乘

之相易淫樂之矇必無人焉故也

千乘相謂子產等也言不為子產殺三盜

得賂而歸之是重
淫樂而輕相國

子罕聞之固請而歸之

言子罕能改過

孫蒯衛大夫田于曹隧

越竟而獵孫蒯林父之子

飲馬于重丘

重丘曹邑

毀其瓶重丘人閉門而詬之

詬罵也

曰親逐而君爾父為

厲

厲惡鬼林父逐君在十四年

是之不憂而何以田為

叔孫穆叔魯大夫叔孫豹也昭公元年諸侯盟于號楚

公子圍設服離衛

設君服二人執戈陳於前以自衛離陳也

叔孫穆子曰楚

公子美矣君哉

美服似君

鄭子皮曰二執戈者前矣

禮國君行有二

執戈者在

蔡子家曰蒲宮有前不亦可乎

公子圍在會特緝蒲為王殿屋

屏蔽以自殊異言既造玉宮而居之雖服君服無所怪也

楚伯州犁曰此行也辭而

假之寡君

聞諸大夫譏之故言假以飾令尹過

鄭行人揮曰假不反矣

言將

遂為君

伯州犁曰子姑憂子皙之欲背誕也

襄三十年鄭子皙殺伯有

背命放誕將為國難言子且自憂此無為憂令尹不反戈

子羽曰當璧猶在假而不

反子其無憂乎

子羽行人公孫揮當璧謂棄疾事在昭十三年言棄疾有當璧之命圍雖取國

猶將有難不無憂也

齊國子曰吾代二子愍矣

國子國弱也二子謂王子圍及伯州

犁圍此冬便篡位不能自終州犁亦尋為圍所殺故言可愍也

陳公子招曰不憂何成

二子樂矣

言以憂生事事成而樂

衛齊子曰苟或知之雖憂何害

齊子齊惡言先知為備
雖有憂難無所損害

宋合左師曰大國令小國共吾

知共而已

能共承大國令不
知其禍福

晉樂王鮒曰小旻之卒章善

矣吾從之

小旻詩小雅其卒章義取非唯暴虎馮河之
可畏也不敬小人亦危殆王鮒從斯義故不

敢譏謂
公子圍

退會子羽謂子皮曰叔孫絞而婉

似君反謂之
絞切也譏其

美故曰婉

宋左師簡而禮

無所臧否故曰簡
共事大國故曰禮

樂王鮒字而敬

字愛也不犯凶
人所以自愛敬

子與子家持之

子子皮子家蔡公孫歸
生持之言無所取與

皆保世之主也齊衛陳大夫其不免乎國子代人憂子

招樂憂齊子雖憂弗害夫弗及而憂與可憂而樂與憂

而弗害皆取憂之道也憂必及之太誓曰民之所欲天

必從之

逸書

三大夫兆憂憂能無至乎

閩憂兆也

言以知物其

是之謂矣

物類也察言多知禍福之數八年陳招殺太子國弱齊惡當身各無患

董叔晉大夫將娶於范氏叔向曰范氏富盍已乎曰欲為繫援焉他日董祁愬之於范獻子曰不吾敬也獻子執而紡於庭之槐叔向過之曰子盍為我請乎叔向曰求繫既繫矣求援既援矣欲而得之又何請焉

叔孫武叔魯大夫也武叔之母死

武叔公子牙之六世孫名州仇毀孔子者

既小斂舉者出尸出戶袒且投其冠括髮

尸出戶乃變服失哀節冠

素委子游曰知禮也

啗之

公叔文子衛大夫也升於瑕丘蘧伯玉從

文子獻公之孫名枝

子曰樂哉斯丘也死則我欲葬焉蘧伯玉曰吾子樂之

則瑗請前

刺其欲害人良田瑗伯玉名

成人有其兄死而不為衰者聞子臯將為成宰遂為衰

成人曰蠶則績而蟹有筐范則冠而蟬有綫兄則死而

子臯為之衰

啗兄死者言其衰之不為兄死如蟹有筐蟬有綫不為蠶之績范之冠范蜂也蟬蛸

也綏謂胡喙
長在腹下

齊人見田駢曰聞先生高誼設為不宦而願為役田駢
曰子何聞之對曰臣聞之鄰人之女田駢曰何謂也對
曰臣鄰人之女設為不嫁行年三十而有七子不嫁則
不嫁然嫁過畢矣今先生設為不宦訾養千鍾徒百人
不宦則然矣而富過畢矣田子辭

漢蕭望之字長倩大將軍霍光秉政長史丙吉薦儒生
王仲翁與望之等數人皆召見當見者露索去刀兵兩

吏挾持望之獨不聽光獨不除用望之仲翁三歲間至
光祿大夫給事中望之復署小苑東門侯仲翁顧謂望
之曰不肯錄錄反抱闕為望之曰各從其志

五鹿充宗為少府貴幸為梁丘易與朱雲論難雲連拄

五鹿君

拄刺也音
知庚切

故諸儒為之語曰五鹿嶽嶽朱雲折

其角

後漢王良東海人建武三年徵諫議大夫遷沛郡太守
至蘄縣稱病不之府上疾篤乞骸骨徵拜大中大夫遷

司徒司直以病歸一歲復徵至滎陽疾篤不任進退乃過其友人友人不肯見曰不有忠言竒謀而取大位何其往來屑屑不憚煩也遂拒之良慙自後連徵輒稱病詔以玄纁聘之遂不應

劉寬為太尉簡畧嗜酒不好盥浴京師以為諺

樂恢薦杜安為宛令以病去章帝行過潁川安上書召拜御史遷至巴郡太守而恢在家安與恢書通問恢告吏口對且讓之曰為宛令不合志病去可也干人主闕

踰非也違平生操故不報

樊英南陽人隱於壺山之陽順帝永建二年徵之英不
得已到京師待以師傅之禮拜五官中郎將數月英稱
疾篤詔以為光祿大夫英辭位不受有詔譬旨勿聽英
初被詔命僉以為必不降志及後應對又無竒謀深策
談者以為失望初河南張楷與英俱徵既而謂英曰天
下有二道出與處也吾前以子之出能輔是君也濟斯
人也而子始以不訾之身怒萬乘之主及其享受爵祿

又不聞扶救之術進退無所據矣

周福甘陵人桓帝為蠡吾侯受學於福及即位擢為尚書時同郡河南尹房植有名當朝鄉人為之謠曰天下規矩房伯武因師獲印周仲進二家賓客互相譏揣遂各樹朋徒漸成仇隙

葛龔梁國人善為文奏或有請龔奏以干人者龔為作之其人寫之忘自載其名因并寫龔名以進之故時人為之語曰作奏雖工宜去葛龔後為蕩陰臨汾令

魏賈逵河東襄陵人少孤家貧冬常無袴過其妻兄柳孚宿至明無何着孚袴去故時人謂之通達逵後為豫州刺史封陽里亭侯

蘇則為侍中舊儀侍中親省起居故俗謂之執虎子始則同郡吉茂者仕厯縣令遷為冗散茂見則嘲之曰仕進不止執虎子則笑曰我誠不能效汝蹇蹇驅鹿車馳也

李豐為尚書僕射弟翼及偉仕數歲間並歷郡守豐常

於人中顯誠二弟言當用榮位及司馬宣王久病偉為
二千石荒於酒亂新平扶風二郡而豐不召衆人以為
恃寵曹爽專政豐依違二公皆無有適莫故于時有謗
書曰曹爽之勢熱如湯太傅父子冷如漿李豐兄弟如
游光其意以為豐雖外清淨而內圖事有侶於游光也
王忠扶風人少為亭長三輔亂忠饑乏噉人隨輦南向
武關值婁子伯為荊州遣迎北方客人忠不欲去因率
等伍逆擊之奪其兵聚衆千餘以歸太祖拜忠中郎將

從征討五官將知忠嘗噉人因從駕出令行排取冢間
髑髏繫着忠馬鞍以為歡笑

常林文帝初為少府林性既自負當官又嚴少府寺與
鴻臚對門時崔林為鴻臚崔性濶達不與林同數數聞
林搥吏聲不以為可林夜搥吏不勝痛叫呼教教徹曙
明日崔出門與林車相遇乃調林曰聞卿為廷尉爾邪
林不覺答曰不也崔曰卿不為廷尉昨夜何故考囚乎
林大慙默不能答

丁謚為度支郎中曹爽宿與相親時爽為武衛將軍數為明帝說其可大用會齊王即位爽輔政乃拔謚為散騎常侍遂轉尚書謚為人外似疎畧而內多忌其在臺閣數有所彈駁臺中患之事不得行又其意輕貴多所忽畧雖與何晏鄧颺等同位而皆少之唯以勢屈於爽爽亦敬之言無不從故于時謗書謂臺中有三狗二狗崖柴不可當一狗憑默作疽囊三狗謂何鄧丁也默者爽小字也其意言三狗皆欲噬人而謚尤甚也

劉放為中書監孫資為中書令並兼侍中光祿大夫放資又典機密夏侯獻曹肇心內不平殿中有鷄棲樹二人相謂曰此亦久矣其能復幾指謂放資也

蜀黃承彥者高爽開朗為沔南名士謂諸葛孔明曰聞君擇婦身有醜女黃頭黑色而才堪相配孔明許即載送之時人以為笑樂鄉里為之諺曰莫作孔明擇婦正

得阿承醜女

承彥史不載官

吳麋芳初為魏南郡太守既降吳虞翻嘗乘船行與麋

芳相逢芳船上人多欲令翻自避先驅曰避將軍船翻
厲聲曰失忠與信何以事君傾人二城而云將軍可乎
芳闔戶不應而遽避之後翻乘車行又經芳營閉門不
得過翻復怒曰當閉反開當開反閉豈得事宜邪芳聞
之有慙色

晉王濟為散騎常侍國子祭酒武帝嘗與濟棊時孫皓
在側謂皓曰何以好剝人面皮皓曰見無禮於君者則
剝之濟時伸脚局下而皓譏焉

謝鯤初辟東海王掾任達不拘尋坐除名隣家高氏女有美色鯤嘗挑之女投梭折其兩齒時人為之語曰任達不已幼輿折齒

鯤字幼輿

鯤聞之傲然長嘯曰猶不廢我

嘯歌

祖納字士言范陽人有操行性至孝平北將軍王敦聞之遺其二婢而辟為從事中郎有戲之曰奴價倍婢納曰百里奚何必輕於五羊皮邪納嘗問梅陶曰君鄉里立月旦評何如陶曰善褒惡貶則嘉法也納曰未益時

王隱在坐因曰尚書稱三載考績三考黜陟幽明何得
一月便行褒貶陶曰此官法也月旦私法也隱曰易稱
積善之家必有餘慶積不善之家必有餘殃稱家者豈
不是官必須積久善惡乃著公私何異古人有言貞良
而亡先人之殃酷烈而存先人之勲累世乃著豈但一
月若必月旦則顏回食埃不免貪污盜蹠引少則為清
廉朝種暮穫善惡未定矣時梅陶及鍾雅數說餘事納
輒困之因曰君汝穎之士利如錐我幽冀之士鈍如槌

持我鈍槌捶君利錐皆當摧矣陶雅並稱有神錐不可得捶納曰假有神錐必有神槌雅無以對

劉輿為范陽王虓魏郡太守虓薨東海王越將召之或曰輿猶膩也近則污人及至越疑而却之

傅迪為右丞時劉柳為尚書左僕射迪好廣讀書而不解其義柳云卿雖讀書多而無所解可謂書簾矣時人重其言

石崇為衛尉嘗與王敦入太學見顏回原憲之像顧而

歎曰若與之同升孔堂古今何必有間敦曰不知餘人云何子貢去卿差近崇正色曰士當身名俱泰何至甕牖哉其立意類此

王粹以貴公子尚主館宇甚盛圖莊周於室廣集朝士使郎中嵇含為之讚含援筆為弔文文不加點其序曰帝堦王宏遠華池豐屋廣延賢彥圖莊生垂綸之像記先達辭聘之事畫真人於刻楮之室載退士於趣進之堂可謂託非其所可弔不可讚也其辭曰邁矣莊周天

縱特放大塊受其生自然資其量器虛神清窮玄極曠
人偽俗季真風既散野無訟屈之聲朝有爭寵之歎上
下相陵長幼失貫於是借玄虛以助溺引道德以自獎
戶詠恬曠之辭家畫老莊之像今王生沉淪名利身尚
帝女連耀三光有出無處池非巖石之溜宅非茅茨之
宇馳屈產於皇衢畫茲像其焉取嗟乎先生高跡何局
生處巖岫之居死寄彫楹之屋託非其所沒有餘辱悼
大道之湮晦遂含悲而吐曲粹有愧色

袁山松陳郡人少有才名時張湛好於齋前種松柏袁山松每出游好令左右作挽歌人謂湛屋下陳尸山松道上行殯山松歷顯位為吳郡太守

王導為丞相妻曹氏性妬導甚憚之乃密造別館以處衆妾曹氏知將往焉導恐妾被辱遽令命駕猶恐遲之以所執麈尾柄驅牛而進司徒蔡謨聞之戲導曰朝廷欲加公九錫導弗之覺但謙退而已謨曰不聞餘物惟有短轆犢車長柄麈尾導大怒謂人曰吾往與羣賢共

遊雒中何曾聞有蔡充兒也

庾亮鎮江州時王導為太傅丞相亮雖居外鎮而執朝廷之權既據上流擁彊兵趣向者多歸之導內不能平嘗遇西風塵起舉扇自蔽徐曰元規塵污人

羊昺字彭祖太傅祐兄孫也少不經學時論皆鄙其凡庸先是兗州有八伯之號其後更有四伯大鴻臚陳留江泉以能食為穀伯豫章太守史疇以大肥為笨伯散騎郎高平張嶷以狡妄為猾伯而昺以狼戾為瑣伯蓋

擬古之四函後為廬陵守坐罪除名

邠超為桓溫大司馬參軍深自結納時王珣為主簿亦為溫所重府中語曰髯參軍短主簿能令公喜能令公怒超髯珣短故也

陶侃為荊州牧既平蘇峻王導入石頭城令取故節侃笑曰蘇武節似不如是導有慙色使人屏之

蔡謨為左光祿大夫開府儀同三司謨初渡江見彭蠡大喜曰蟹有八足加以二螯令烹之既食吐下委頓方

知非蟹後詰謝尚而說之尚曰卿讀爾雅不熟幾為勸學死

何充為揚州刺史侍中錄尚書事充性好釋典阮裕嘗戲之曰卿志大宇宙勇邁終古充問其故裕曰我圖數千戶郡尚未能得卿圖作佛不亦大乎

郗愔為司空及弟曇奉天師道而何充與弟準崇信釋氏謝萬譏之云郗諂於道何佞於佛

劉惔為丹陽尹許珣嘗就惔宿牀帷新麗飲食豐甘詢

曰若此保全殊勝東山快曰卿若知吉凶繇人吾安得不保此王羲之在坐曰令巢許遇稷契當無此言二人並有愧色

謝安少有重名初辟司徒府除佐著作郎並以疾辭寓居會稽除尚書吏部郎並不至後征西大將軍桓溫請為司馬將發新亭朝士咸送中丞高崧戲之曰卿屢違朝旨高卧東山諸人每相與言安石不肯出將如蒼生何蒼生今亦將如卿何安甚有愧色

王愉子綏字彥猷愉為殷桓所捕綏未測存亡在都有
憂色居處飲食每事貶降時人每謂試守孝子後為荆
州刺史誅

戴逵譙國人謝敷會稽人隱於太平山初月犯少微少
微一名處士星占者以隱士當之逵有美才人或憂之
俄而敷死故會稽人士以嘲吳人云吳中高士便是求
死不得死

宋何尚之為尚書令太子詹事致仕於方山孝武徵之

乃起拜開府天子臨軒百僚陪位沈慶之累辭爵命朝廷敦勸甚篤尚之謂曰主上虛懷側席詎宜固辭慶之曰沈公不效何公去而復還也尚之有愧色

張暢初為南譙王義宣安北長史及義宣反戰敗暢為軍人所掠執送都下付廷尉見原起為都官尚書轉侍中孝武宴朝賢暢亦在坐何偃因醉曰張暢竒才也與義宣作賊而卒無咎苟非竒才安能致此暢曰太初之時誰黃其閣帝曰何事相苦初何尚之為元凶司空及

義師至新林門人皆逃尚之父子共洗黃閭故暢以此
譏之

王遠為光祿勳人為之語曰王遠如屏風屈曲從俗能
蔽風露

庾登之為謝晦荊州長史晦拒王師欲登之留守登之
不許晦敗登之以無任免官禁錮還家何承天戲之曰
因禍為福未必皆知登之曰我亦幾與三監同戮承天
為晦作表云便當浮舟東下戮此三監故登之為朝

謝莊為左將軍莊有口辯孝武嘗問顏延年曰謝希逸月賦何如答曰美則美矣但莊始知隔千里兮共明月帝召莊以延年答語語之莊應聲曰延年作秋胡詩始知生為久離別沒為長不歸帝撫掌大笑竟日後莊代顏竣為吏部尚書竣留心選舉自強不息任遇既隆奏無不可而容貌嚴毅莊風姿甚美賓客喧訴嘗懽笑答之意多不行時人為之語曰顏竣嗔而與人官謝莊笑而不與人官位終中書令散騎常侍金紫光祿大夫

何昌寓為吏部尚書嘗有一客姓閔求官昌寓謂曰君是誰後答曰子騫後昌寓團扇掩口而笑謂坐客曰遙遙華胄

顏延之為太常與何尚之少相好狎二人並短小尚之嘗謂延之為猿延之目尚之為猴同遊太子西池延之問路人云吾二人誰似猴路人指尚之為似延之喜笑路人曰彼似猴耳君乃真猴

南齊丘靈鞠為正員常侍靈鞠好飲酒臧否人物在沈

淵座見王儉詩淵曰王令文章大進靈鞠曰何如我未
進時此言達儉靈鞠宋世文名甚盛入齊頗減蓬髮弛
縱無形儀不治家業王儉謂人曰丘公仕宦不進才亦
退矣

沈文季吳興人為尚書右僕射明帝即位加領太子詹
事尚書令王晏嘗戲文季為吳興僕射文季答曰瑯琊
執法似不出卿門

褚淵仕宋為尚書令侍中受宋明帝顧命為中書監開

府儀同三司司空太祖即位又為尚書令輕薄子頻以名節譏之淵眼多白精謂之白虹貫日言為宋亡徵也褚炤字彥宣少秉高節一目眇官至國子博士不拜嘗非從兄淵身事二代聞淵拜司徒歎曰使淵作中書郎而死即當是一名士德之不昌遂有期頤之壽

張敬兒為散騎常侍車騎將軍加開府儀同三司既拜王敬則戲之呼為褚淵敬兒曰我馬上所得終不能作華林閣勳也敬則甚恨

陸澄為光祿大夫散騎常侍當世稱為碩學讀易三年不解文義欲撰宋書竟不成王儉戲之曰陸公書厨也梁何敬容為尚書令參掌機密自晉宋以來宰相皆文義自逸敬容獨勤庶務為當世所嗤鄙時蕭琛子巡頗有輕薄才因制卦名離合等詩以嘲之敬容處之如初亦不屑也敬容捨宅東為伽藍趨勢者因助財造構敬容並不拒故此寺堂宇校飾頗為宏麗時輕薄者因呼為衆造寺焉

何點宋司空尚之孫也父鏐素有風疾無故害妻坐法
死點感家禍欲絕婚宦尚之彊為之娶王氏涕泣求執
本志得罷既老又娶魯國孔嗣女雖婚亦不與妻相見
築別室以處之人莫諭其意吳國張融少時免官而為
詩有高尚之言點答詩曰昔聞東都日不在簡書前雖
為戲也而融深病之及點後婚融始為詩贈點曰惜哉
何居士薄暮遘荒淫點亦病之而無以釋也

孫廉東莞莒人便僻巧宦為吳興太守時廣陵高爽有

險薄才容於廉廉委以文記爽嘗有求不稱意乃為屐
謎以喻廉曰刺鼻不知嚏蹋面不知瞋齧齒作步數持
此得勝人譏其不計耻辱以此取名位也爽博學多才
劉禕為晉陵縣爽途經詣之了不相接爽甚銜之俄而
爽代禕為縣禕遣迎贈甚厚爽受餉答書云高晉陵自
答人問其所以答云劉禕餉晉陵令爾何關爽事又有
人送書與爽告躓云比日守羊困苦爽答曰守羊無食
何不貨羊糶米孫抱為延陵縣爽又詣之抱了無故人

之懷爽出從縣閣下過取筆書鼓云徒有八尺圍腹無一寸腸面皮如許厚受打未渠央抱東莞人形體肥壯腰帶十圍爽故以此激之

鮑泉為通直侍郎嘗乘高幟車從數十左右繖蓋服玩甚精道逢國子祭酒王承承疑非舊貴遣訪之泉從者答曰鮑通直承怪焉復欲辱之遣逼車問鮑通直復是何許人而得如此都下少年遂以為笑謔

蕭推字智進歷淮南晉陵吳郡太守所臨必赤地大旱

吳人呼為旱母焉

到溉為吏部尚書時何敬容以令參選事有不允溉輒相執敬容謂人曰到溉尚有餘臭遂學作貴人敬容方貴寵人皆下之溉忤之如初溉父彥之初以擔糞自給故世為譏焉

後魏孝明靈太后嘗幸左藏王公嬪主從者百餘人皆令任力負布絹即以賜之多者過二百疋唯長樂公主手持絹二十疋而出示不異衆而無勞也世稱其廉儀

同陳留公李崇章武王融並以所負多顛仆於地崇傷
腰融損脚時人語曰陳留章武傷腰折股貪人敗類穢
我明主

廣陵侯衍弟欽曾託青州人高僧壽為子求師至未幾
逃去欽以讓僧壽僧壽性滑稽反謂欽曰凡人絕粒七
日乃死始經五朝便爾逃遁去食就信實有所闕欽乃
大慙於是待客稍厚

公孫軌為虎牢鎮將初太武將北征發民驢以運糧使

軌部調雍州軌令驢主皆加絹一疋乃與受之百姓為之語曰驢無強弱輔脊自壯衆共唾之坐徵還

郭祚宣武時為太子少師祚曾從宣武幸東宮孝明幼弱祚懷一黃罽出奉孝明時應詔左右趙桃弓與御史中尉王顯迭相唇齒深為宣武所信祚私事之時人謗祚者號為桃弓僕射黃罽少師

邢昕為通直常侍中軍將軍既有才藻兼長几案自孝昌之後天下多務世人竟以吏行取達文學大衰司州

中從事宋遊道以公斷見知時與昕嘲謔昕謂之曰世事同知文學外遊道有慙色興和中以本官副李象使於梁昕好忤物人謂之牛是行也談者謂之牛象鬪於

江南

北齊楊愔為吏部尚書典選取士多以言貌時致謗言以為愔之用人似貧士市瓜取大者愔聞不以屑意愔自居大位前後賞賜散之九族架篋之中唯有書數千卷太保平原王陵之與愔隣宅愔嘗見其門外有富胡

數人謂左右曰我門前幸無此物

陽休之魏武定二年除中書侍郎時有人士戲嘲休之云有觸藩之羝羊乘連錢之驄馬從晉陽而向鄴懷屬書而盈把尚書左丞盧斐以其文書請謁啓高祖禁止會赦不治

祖珽初為文宣開府倉曹參軍所乘老馬嘗稱駟駒又與寡婦王氏姦通每人前相聞往復裴讓之與珽卑狎於衆中嘲珽曰卿那得如此詭異老馬年十歲猶號駟

駒一妻耳順尚稱娘子于時諠然稱之

趙彥深為中書令廢帝既殺楊愔乃以彥深代摠機務
鴻臚少卿陽休之私謂人曰將涉千里殺騏驎而策蹇
驢可悲之甚

隋柳調為侍御史左僕射楊素嘗於朝堂見調因獨言
曰柳條通體弱獨搖不須風調斂板正色曰調信無取
者公不當以為侍御信有可取不應發此言公當具瞻
之地樞機何可輕發素甚竒之

周羅暉初為陳將陳平行軍總管賀若弼謂羅暉曰聞公在郢漢提兵即知揚州可得王師利涉果如所量羅暉答云若得與公周旋勝負未可知也後為儀同三司先是陳裨將羊翔歸降使為鄉導位至上開府班在羅暉上韓擒虎於朝堂戲之曰不知機變立在羊翔之下能無愧乎羅暉答曰昔在江南久承令聞謂公天下節士今日所言殊匪誠臣之論擒虎有愧色

柳機初仕後周為司宗中大夫遷御正上大夫開皇中

為冀州刺史後徵入朝初機在周與族人文城公昂俱
歷顯要及此機昂並為外職楊素時為納言方用事因
帝賜宴素戲機曰二柳俱摧孤楊獨聳坐者皆笑機竟
無言

李文博初在內省校書虞世基子亦在其內盛飾容服
而未有所知文博因從容問其年紀答云十八文博乃
謂之曰昔賈誼當此之年議論何事君今從事儀容欲
何為者

唐姜恪為左相咸亨元年閏九月為涼州道行軍大總管以禦吐蕃時右相閻立本以善畫見稱與恪皆無輔弼之譽時人為之語曰左相則宣威沙漠右相則馳譽丹青三館學生放散五臺令史明經至今相傳以為口實

來常及弟濟相次為侍中其父護兒初在隋為猛將而常濟俱以學行見稱時虞世南子昶既無才術歷將作少匠工部侍郎累居工作之司濟初升相位許敬宗歎

曰士之登用不繫世業得道則為衣冠失緒則為匹庶
來護兒兒作宰相虞世南男作木匠忠賢文武固無種
也

裴光庭為吏部尚書時有門下主事閻麟之為光庭腹
心專知吏部選官每麟之裁定光庭隨而下筆時人語
曰麟之口光庭手也

崔日知為太常卿自以歷任年久每朝士參集常與尚
書同列時人號為尚書裏行遂為口實

楊再思為內史為人邪佞時左補闕戴令言作兩脚野狐賦以譏刺之再思聞之甚怒出令言為長杜令朝士尤加唾笑

周寶為潤州節度使軍變奔毗陵淮南節度使高駢聞之大喜遂遣使致書於寶曰伏承走馬已及奔牛

堰名在常

州今附壘一瓶葛粉十斤以充道路所要蓋諷其為壘粉也

梁成汭為荆南節度使初澧朗二州本屬荆南乾寧中

為土豪雷滿所據。洩奏請割隸宰相徐彥若執而不行。洩由是銜之。及彥若出鎮南海，路過江陵，洩雖加延接而猶怏怏。嘗因對酒語及其事，彥若曰：「今公位尊方面，自比桓文，雷滿者偏州一草賊爾。今公何不加兵而反怨朝廷乎？」洩赧然而屈。因思嶺外有黃茅瘴，患者皆落髮，乃謂彥若曰：「黃茅瘴望相公保重。」彥若應聲答曰：「南海黃茅瘴不死成和尚，蓋譏洩曾為僧也。洩終席慙耻後唐馮道為相，工部侍郎任贊因班退與同列戲道於

後曰若急行必撲下兔策道尋知之召贊謂曰兔策皆名儒所集道能諷之中朝士子止看文場秀句便為舉業皆竊取公卿何淺狹之甚邪贊大愧焉

封舜卿仕梁為禮部侍郎知貢舉開平三年奉使幽州以門生鄭致雍從行復命之日又與致雍同受命入翰林為學士致雍有俊才舜卿雖有文辭才思拙澁及試五題不勝困弊因託致雍秉筆當時譏者以為座主辱

門生

蕭希甫為駕部郎中莊宗初平汴維希甫奉詔宣慰青
齊方知其母死妻袁氏亦已改嫁乃持服於魏州時議
者戲引李陵書譏之云老母終堂生妻去室

安重霸善事人好賂遺君側人目之為傀

涉瓦切

胡

崔貽孫為吏部侍郎黜於塞北遇赦還京時崔沂方為
左丞沂之年小貽孫數歲貽孫切於其闕每言於僚友
曰崔丞已薄桑榆何無止足

王緘幽州劉仁恭故吏也莊宗承制授魏博節度副使

緘博學善屬文燕薊多文士緘後生未知名及在太原名位驟達燕人馬郁有盛名於鄉里而緘素以吏職事郁及郁在太原謂緘曰公在此作文士所謂避風之鳥受賜於魯人也每於公宴但呼王緘而已

王思同幽州人初仕武皇為飛勝指揮使從莊宗累典諸軍思同性疎俊粗有文性喜為詩什與人唱和稱薊門戰客魏王繼友待之若子時內養呂知柔侍興聖宮頗用事思同不平之呂為終南山詩末句有頭字思同

曰料伊直擬衝霄漢賴有青天壓著頭

盧文紀入相時有蜀人史在德為著作郎出入權要之門評品朝士多有譏彈乃上章云文武兩班宜選能進用見在軍都將校朝廷士大夫並請閱試澄汰能者進用否者黜退不限名位高下疏下中書文紀以為非已怒甚召諫議盧損為覆狀辭旨蕪蔓無以抑其狂率為衆所嗤

馬胤孫初仕後唐為相胤孫純儒事多疑滯遽被疇庸

未悉朝廷舊事初馮道罷左相馮入朝拜司空唐朝故
事三公為加官無單拜者是時朝議率爾命道制出或
曰三公正宰相便合參大政又云合受冊衆言藉藉盧
文紀又欲祭祀時便令掃除馮道聞之曰司空掃除吾
職也吾無所憚既而知非乃止劉昫為僕射性剛羣情
嫉之乃共贊右常侍孔昭序論行香次第言常侍侍從
之臣行立可在僕射前疏奏下御史臺定例同光已來
李琪盧質繼為僕射質性輕脫不能守師長之體故昭

序輕言胤孫以羣情不悅劉昫馮道欲微抑之乃責臺
司須簡則例而臺言舊不見例據南北班位常侍在前
屬國忌將就列未定胤孫即判臺狀曰即有援據定可
遵行各示本官劉昫怒揮袂而退自後日責臺司定例
崔居儉謂南宮同列曰孔昭序解語是朝廷人總不解
語也僕射師長中丞大夫就班修敬常侍班南宮六卿
之下况僕射乎已前騎省年深望南宮工部侍郎如霄
漢癡人舉止何取笑之深邪旬日聞居儉言紛議稍息

文士哂肩孫堂判有援據二字其中書百職肩孫素未
詳悉無能專使署名而已其故人干進者不如意故啗
之曰馬公為輔三不開為門口印也後為太子賓客卒
後旬日侍婢零語如肩孫聲氣處分家事仍曰借某書
負某物當速還明宗朝崔協物故亦有婢忽作協語時
知制誥于嶠與閣下諸舍人嘲曰生前瘕治曾不聞於
上言死後魂靈但空聞其下語肩孫侍婢傳言時人復
念之蓋其事甚類矣

盧損為太子少保致仕損梁開平初與任贊劉昌素薛
均高摠同年擢第所在相詬時人謂之相罵榜

冊府元龜卷九百三十九

欽定四庫全書

冊府元龜卷九百四十

宋王欽若等撰

總錄部

不嗣

患難

不嗣

夫以堯舜之仁聖而丹朱商均之不肖何況臣庶之子
孫不克負荷者多矣故有擅藻麗之文而其子頑闇有
神明之政而其息貪暴有翼戴之勲而其嗣顛覆有脩

謹之操而其齋悖亂故有懷知子之先見嘆承家之乏嗣形於悲咤良亦可哀而坤之文言曰積善之家必有余慶積不善之家必有余殃則先聖之旨將有屬焉

帝鴻氏有不才子

帝鴻黃帝

掩義隱賊好行克德醜類惡物

頑嚚不友是與比周

醜亦惡也比近也周密也

天下之民謂之渾敦

謂驩堯渾敦不開通之貌

少皞氏有不才子

少皞金天氏之號次黃帝

毀信廢忠崇飾惡言靖

諧庸回服讒蒐慝以誣盛德

崇聚也靖安也庸用也回邪也服行也蒐隱也慝惡

也盛德
賢人也

天下之民謂之窮奇

謂共工其行
窮其好奇

顓頊氏有不才子不可教訓不知話言

話善也

告之則頑

德義
不入

舍之則囂

不道
忠信

傲狠明德以亂天常天下之民謂

之禱杙

謂蘇禱杙頑凶
無禱匹之貌

緡雲氏有不才子

緡雲黃帝
時官名

貪于飲食冒于貨賄侵欲

崇侈不可盈厭聚斂積實不知紀極不分孤寡不恤窮

匱

冒亦貪也盈
滿也實財也

天下之民比之三凶

非帝王子孫故
別以比三凶

謂

之饗饗

貪財為饗
貪食為饗

漢劉纏即項伯也高祖五年降漢賜姓劉氏封射陽侯

射或作貫嗣子睢有罪不得代

石慶為丞相時諸子孫為吏至二千石者十三人及慶死後稍以罪失孝謹衰矣

金日磾為光祿大夫有二子賞奉車建駙馬都尉及孫則衰矣

霍光為大將軍而子禹與張安世子千秋俱為中郎將皆將兵隨度遼將軍范明友擊烏桓還謁大將軍光

問千秋戰鬪方畧山川形勢千秋口對兵事畫地成圖
無所忘失光復問禹不能記曰皆有文書光由是賢千
秋以禹為不才歎曰霍氏世衰張氏興矣及禹誅滅而
安世子孫相繼

晉王導為丞相其子恬少好武不為公門所重導見恬
便有怒色

梁王茂為司空侍中封望蔡縣公及薨子貞秀嗣以居
喪無禮為有司所奏徙越州

賓客施與不節資產既盡鬱鬱不得志遂謀奔陳事覺

誅

後魏劉休賓初仕宋為幽州刺史鎮梁鄒後以城降休
賓叔父旋之早亡其妻許氏携二子法鳳法虎入國孤
貧不自立並疎薄不倫為時人所棄母子皆出家既而
反俗孝文太和中選盡物望河南人士才學之徒咸見
申擢法鳳兄弟無可收用不蒙選授

田彪北平人初仕北燕馮跋與石城太守李崇俱降而彪子孫道徽劣焉

盧度世為青州刺史卒其子淵昶等並脩文風顯閨門之禮為世所推後淵兄弟既亡家風衰損子孫多非法惟薄混穢為時論所鄙

平恒為秘書丞博通經籍而三子並不率父業好酒自棄恒常忿其世衰植杖巡舍側垆而哭不為營事婚宦任意官娶故仕聘濁碎不得及其門流恒婦弟鄧宗慶

及外甥孫元明等每以為言恒曰此輩會是衰頓何煩勞我

夏侯史瀛州刺史道遷之子為鎮遠將軍性好酒居喪不戚醇醪肥鮮不離於口沽買飲噉多所費用父時田園貨賣畧盡人間債負猶數千餘匹穀食至常不足弟妹不免饑寒

李肩護晉司徒廣陸侯允八世孫允子順璠及孫沉志皆為名宦沉孫根為慕容寶中書監根子後智等隨慕容

容德南渡河居青州數世無名位三齊豪門多輕之
北齊邢邵為太常卿中書監其文章典麗獨步當時而
孽子大德大道畧不識字焉

隋長孫平高祖仁壽中為太常卿判吏部尚書賜爵襄
陽公卒官子師孝性輕狡好利數犯法帝以其不克負
荷遣使弔平國官師孝後為渤海王薄政教凌遲師孝
恣行貪濁為王世充所害

唐楊師道尚高祖女桂楊公主為太常卿駙馬都尉師

道卒子豫之不肖薄行太宗常謂羣臣曰子有孝與不孝臣有忠與不忠公等見不孝之子不忠之臣豈不同嫉然不孝之子父母亡沒已後肆情為惡虧犯名教良由闕於義方今緣師道兒喪虧禮節誠所難恕若訓導合宜縱其頑鄙猶不至狼狽公等各有子弟咸須示語無賴者亦勿存育乃令司徒長孫無忌往豫之家分其貲產家人以與長姊及同產兄趙斌等後豫之在母服淫亂為駙馬都尉竇奉節所執捶擊無數因割去耳鼻

然後死

虞世南太宗時為秘書監文學德行時稱五絕其子昶既無才術歷將作少匠工部侍郎累居工作之司時來常父護兒在隋為猛將常與弟濟俱以學行見稱相次為侍中許敬宗歎曰士之登用不繫世業履道則為衣冠失緒則為匹庶來護兒兒作宰相虞世南男作木匠忠賢文武固無種也

狄仁傑則天時為魏州刺史人為立生祠及去職後其

子景暉為魏州司功參軍貪暴為人所惡由是遽毀其神像焉

王方慶則天時為相聚書甚多不減秘閣至於圖畫多異本諸子莫能守其業卒後尋併散亡

李嶠中宗朝與蘇瓌同居相位嶠有才華其子不肖瓌以幹理而子頊有文詞故代稱蘇瓌有子李嶠無兒

劉贊祖父皆以文學稱贊獨不知書為宣州刺史宣歙池觀察使唯以彊猛立威官吏畏重之宣州天下殷贍

處也贊厚斂財貨以務貢獻用求恩寵又無教訓子孫
童稚者便以驕傲為事

崔行功總章中秘書少監兼通事舍人有文集四十卷
自行功以降名位卑替

李日知中宗景龍初以刑部尚書罷知政事孝行知足
為時所稱少子伊衡以妾為妻費散田宅仍列訟諸兄
家風替矣

劉崇龜父藻生八子弟崇魯為水部郎中知制誥與宰

相崔昭緯相善昭宗命翰林學士李谿為相昭緯與崇魯謀沮之及谿宣制之日出班而哭由是谿命不行谿自十一月至歲暮聯上十表訴寃其詞詆毀所不忍聞時崇龜在外聞之大恚數日不食謂其親曰吾家兄弟進身有素未嘗以聲利敗名吾門不幸生此等也

晉張從賓父全義為河南尹四十年積而能散以至令終及從賓繼祚好治生商賈盈門多藏而致禍也

患難

老子有言禍兮福所倚福兮禍所伏則知患難之於世也無準否泰之於人也靡常消息盈虛既明鑒而斯在屈伸合散信任運而可量叔世惟艱聖人陞厄而體道禍機莫測賢者逃遜以俟時至有沈廁以幸全繫獄而獲宥道存於己命在於天或垂名聲於後代或擅美譽於當世信謂知窮達存亡之至者也若乃被患於深刑無辜於橫議道之廢也其如命何

孔子將適陳過長垣顏刻為僕以其策指之曰昔吾入

此由彼缺也長垣人聞之以為魯之陽虎嘗暴長垣人

長垣人於是遂止孔子孔子狀類陽虎拘焉五日顏淵

後

言與孔子相失故在後也

子曰吾以汝為死矣顏淵曰子在回何

敢死

言夫子在己無所致死也

長垣人拘孔子益急弟子懼孔子曰

文王既没文不在茲乎

茲此也言文王雖已沒其文見在此此自謂其身也

天之

將喪斯文也後死者不得與于斯文

文王既沒故孔子自謂後死也言天

將喪此文本不當使我知之今使我知之未欲喪之也

天之未喪斯文也長垣人

其如子何

如子何猶言奈我何也天未喪此文則我當傳之長垣人欲奈我何言不能違天以害己

孔子使從者為甯武子臣於衛然後得去又適宋

年表定公

十三年孔子至衛十四年
至陳哀公三年孔子過宋

與弟子習禮大樹下宋司馬

桓魋欲殺孔子拔其樹孔子去弟子曰可以速矣孔子

曰天生德於予桓魋其如予何

天生德者謂既以聖德
性合天地吉無不利故

曰具如
予何

又居陳三歲會晉楚爭強更伐陳及吳侵陳陳

常被寇孔子曰歸與歸與吾黨之小子狂簡進取不忘

其初於是孔子去陳過蒲會公叔氏以蒲畔蒲人止孔

子弟子有公良孺者以私車五乘從孔子其為人長賢

有勇力謂曰吾昔從夫子遇難於長垣今又遇難於此
命也已吾與夫子再罹難寧鬪而死鬪甚疾蒲人懼謂
孔子曰苟毋適衛吾出子與之盟出孔子東門孔子遂
適衛子貢曰盟可負耶孔子曰要盟也神不聽又遷于
蔡三歲吳伐陳楚救陳魯哀公四年軍于城父聞孔子在陳
蔡之間楚使人聘孔子孔子將往拜禮陳蔡大夫謀曰
孔子賢者所刺譏皆中諸侯之疾今者久留陳蔡之間
諸大夫所設行非仲尼之意今楚大國也來聘孔子孔

子用於楚則陳蔡用事大夫危矣於是乃相與發徒役

圍孔子於野不得行絕糧從者病莫能興興起也孔子講

誦弦歌不衰子路愠見曰君子亦有窮乎孔子曰君子

固窮小人窮斯濫矣濫溢也君子固亦有窮時但不如小人窮則濫溢為非子貢

色作孔子曰賜爾以予為多學而識之者與曰然然謂多學

而識之問今不然耶非與孔子曰非也子一以貫之善有元事有會天下

殊途而同歸百慮而一致知其元則衆善舉也故不待學以一知之孔子知弟子有愠心

乃名子路而問曰詩云匪兕匪虎率彼曠野率循也吾非兕虎而

循曠野也

吾道非耶吾何為於此子路曰意者吾未仁耶人之

不我信也

言人不信吾豈以未仁故乎

意者吾未知耶人之不我行

也

言人不使通行而困窮者豈以我未知乎

孔子曰有是乎由譬使仁者而

必信安有伯夷叔齊使知者而必行安有王子比干子

路出子貢入見孔子曰賜詩云匪兕匪虎率彼曠野吾

道非耶吾何為於此子貢曰夫子之道至大也故天下

莫能容夫子夫子蓋少貶焉孔子曰賜良農能稼而不

能為穡

種之為稼斂之為穡言良農能善種之未必能斂獲之

良工能巧而不能

為順

言良工能巧而已不能每順人之意

君子能脩其道綱而紀之統而

理之而不能為容今爾不脩爾道而求為容賜而志不

遠矣子貢出顏回入見孔子曰回詩云匪兕匪虎率彼

曠野吾道非耶吾何為於此顏回曰夫子之道至大故

天下莫能容雖然夫子推而行之不容何病不容然後

見君子夫道之不脩也是吾醜也夫道既已大脩而不

用是有國者之醜也不容何病不容然後見君子孔子

欣然而笑曰有是哉顏氏子使爾多財吾為爾宰

宰主財者

也為女主財
言志之同也

於是使子貢至楚楚昭王興師迎孔子然
後得免

范睢字叔先事魏中大夫須賈須賈為魏昭王使於齊
范睢從留數月未得報齊襄王聞睢辯言乃使人賜睢
金十斤及牛酒睢辭謝不敢受須賈知之大怒以為睢
持魏國陰事告齊故得此饋令睢受其牛酒還其金既
歸心怒睢以告魏相魏之諸公子曰魏齊大怒使舍人
笞擊睢折脅摺齒睢佯死即卷以箒置廁中賓客飲者

醉更溺睢故僇辱以懲後令無妄言者睢從箚中謂守者曰公能出我我必厚謝公守者乃請出棄箚中死人魏齊醉曰可矣范睢得出

後漢樊宏少有志行王莽末義兵起劉伯升與族兄賜俱將兵攻湖陽城守不下賜女弟為宏妻湖陽由是收繫宏妻子令出譬伯升宏因留不反湖陽軍師欲殺其妻子長吏以下共相謂曰樊重子父禮義恩德行於鄉里雖有罪且當在後會漢兵日盛湖陽惶急未敢殺之

遂得免脫後至光祿大夫位特進

來歙光武祖姑之子光武甚親敬之數共往來長安漢
兵起王莽以歙劉氏外屬乃收繫之賓客共篡奪得免
寒朗字伯竒魯國薛人也生三日遭天下亂棄之荆棘
數日兵解母往視猶尚氣息遂收養之後至清河太守
趙岐字邠卿京兆長陵人也岐少明經有才藝年三十
餘有重疾臥蓐七年

蓐寢蓐也聲類曰蓐薦也

其後疾瘳為京兆功

曹先是中常侍唐衡兄玃

玃音玄

為京兆虎牙都尉郡人

以珰進不繇德皆輕侮之岐及從兄襲又數為貶議珰
深毒恨珰為京兆尹岐懼禍及乃與從子戩逃避之珰
果收岐家屬宗親陷以重法盡殺之岐遂逃難四方江
淮海岱靡所不歷自匿姓名賣餅北海市中時安丘孫
嵩藏岐複壁中數年岐作扈屯歌二十三章後諸唐死
滅因赦乃出公卿舉岐擢拜并州刺史坐黨事免靈帝
初復遭黨錮十餘歲中平元年四方兵起詔選故刺史
二千石有文武才用者徵岐拜議郎車騎將軍張溫西

征關中請補長史別屯安定大將軍何進舉為燉煌太守行至襄武岐與新除諸郡太守數人俱為賊邊章等

所執賊欲脅以為帥岐詭辭得免展轉還長安

岐還至陳倉復

遇亂兵裸身得免在草中十二日不食也

杜林扶風茂陵人也初為郡吏王莽末盜賊起林與弟成及同郡范逵孟冀等將細弱俱客河西道逢賊數千人遂掠取財裝褫奪衣服拔刃向林等將欲殺之冀仰曰願一言而死將軍知天神乎赤眉兵衆百萬所向無

前而殘賊不道卒至破滅今將軍以數千之衆欲規霸王之事不行仁恩而反遵覆車不畏天乎賊遂釋之俱免於難後至大司空

魏郭淮為征西將軍都督雍涼諸軍事淮妻王凌之妹凌誅妹當從坐御史往收督將及羗胡渠帥數千人叩頭請淮表留妻淮不從妻上道莫不流涕人人扼腕欲却留之淮五子叩頭流血請淮淮不忍視乃命左右追妻於是追者數千騎數日而還淮以書白司馬宣王曰

五子哀母不惜其身若無其母是無五子無五子亦無
淮也今輒追還若於法未通當受罪於主者覲展在近
書至宣王亦宥之

蜀裴雋字奉先魏尚書令潛弟也雋姊夫為蜀中長史
雋送之時年十餘歲遂遭漢末大亂不得還既長知名
為蜀所推重也

吳黃蓋字公覆隨周瑜拒曹公於赤壁為流矢所中時
寒墮水為吳軍人所得不知其蓋也置廁牀中蓋自彊

以一聲呼韓當當聞之曰此公覆聲也向之垂涕解易其衣遂以得免後至武鋒中郎將

晉王尼字孝孫辟車騎府舍人不就值維陽陷避亂江夏時王澄為荊州刺史遇之甚厚尼早喪婦止有一子無居宅惟畜露車有牛一頭每行輒使子御之暮則共宿車上常歎曰滄海橫流處處不安也俄而澄卒荆土饑荒尼不得食乃殺牛壞車煮肉噉之既盡父子俱餓死

摯虞流離鄠杜之間轉入南山中糧絕餓甚拾橡實而食之後得還洛歷光祿勳太常卿及洛京荒亂盜竊從橫人饑相食虞素清貧遂以餒卒

鮑靚為南海太守嘗行部入海遇風饑甚取白石煮食之以自濟

南燕慕容超字祖明德之兄北海王納之子時慕容垂起兵山東苻昌收納及諸德子皆誅之納母公孫氏以老耄獲免納妻段氏方娠未決囚之于郡獄獄掾呼延

平德之故吏也嘗有死罪德免之至是將公孫及段氏
逃于羗中而生超焉年十歲而公孫氏卒臨終授超以
金刀曰若天下太平汝得東歸可以刀還汝叔也平又
將超母子奔于呂光及呂隆降于姚興超又隨涼州人
徙于長安

宋江謚字令和父徽宋尚書都官郎吳令為太祖所殺
謚繫尚方孝武平京邑乃得出後至左戶尚書

王懿字仲德父苗事苻堅為二千石及堅敗仲德年十

七與兄敵同起義兵與慕容垂戰敗仲德被重創走與
家屬相失經大澤不能前困卧林中忽有青衣童兒騎
牛行見仲德問曰食未仲德告饑兒去頃之復來携食
與之仲德食畢欲行會水潦暴至莫知所之有一白狼
至前仰天而號號訖銜仲德衣渡水仲德隨之獲濟與
敵相及渡河至滑臺復為翟遼所留使為將帥積年仲
德欲南歸乃奔太山遼遣騎追之急夜行忽有炬火前
導仲德隨之行百許里乃免後至徐州刺史

朱脩之為司徒從事中郎後隨到彥之北伐彥之自河
南迴留脩之戍滑臺為虜所圍數月糧盡將士熏鼠食
之遂陷於虜初脩之母聞其被圍既久嘗憂之忽一日
乳汁驚出母號泣告家人曰吾今已老忽復有乳汁斯
不祥矣吾兒其不利乎後問至修之果以此日陷沒元
魏嘉其守節以為侍中妻以宗室女脩之潛謀南歸妻
疑之每流涕問其意脩之雖嘉其義終竟不告也後鮮
卑馮宏稱燕王都黃龍元魏伐之脩之與同沒人邢懷

明並從又有徐卓者復欲率南人竊發事泄被誅脩之
懷明懼奔馮宏宏不禮留一年會宋使傳詔至脩之名
位素顯傳詔見即拜之彼國敬傳詔謂為天子邊人見
其致敬於脩之乃始加禮時魏屢伐宏或說宏遣脩之
歸求救遂遣之泛海至東萊遇猛風柁折垂以長索船
乃復正海師望見飛鳥知其近岸須臾至東萊元嘉九
年至京邑以為黃門侍郎

梁沈約字休文父璞淮南太守璞元嘉末被誅約尚幼

潛竄會赦免既而流寓孤貧後至尚書僕射

范雲起家郢州西曹書佐轉法曹行參軍俄而沈攸之舉兵圍郢城父抗時為府長流入城固守留家屬居外雲為軍人所得攸之召與語聲色甚厲雲容貌不變徐自陳說攸之乃笑曰卿定可兒且出就舍明日又召令送書入城城內或欲誅之雲曰老母弱弟懸命沈氏若違其命禍必及親今日就戮甘心如薺長史柳世隆素與雲善乃免之後至尚書令

裴邃舉秀才對策高第奉朝請東昏踐祚始安王蕭遙
光為撫軍將軍揚州刺史引邃為參軍後遙光敗邃還
壽陽值刺史裴叔業以壽陽降魏州之豪族皆被驅掠
邃遂隨衆北徙魏宣武帝雅重之以為司徒屬中書郎
魏郡太守魏遣王肅鎮壽陽邃固求隨肅密圖南歸天
監初自拔還朝除後軍諮議參軍

袁昂父顛為雍州刺史泰始初舉兵奉晉安王子勛事
敗誅死昂時年五歲乳媪携抱匿於廬山會赦得出猶

徙晉安至元徽中走還時年十五後至司空

陸襄為度支尚書太清二年侯景舉兵圍宮城以襄直
侍中省三年三月城陷襄逃還吳賊尋寇東境景將宗
子仙進攻錢塘海鹽人陸黯舉義有衆數千人夜出襲
郡殺偽太守蘇單于推襄行郡事淮南守文成侯蕭寧
逃賊入吳襄遣迎寧為盟主遣黯及兄子映公帥衆距
子仙子仙聞兵起乃退還與黯戰黯敗走吳下軍聞之
亦各奔散襄匿于墓下一夜憂憤卒時年七十

賀琛為中軍宣城王長史侯景陷城琛被創未死賊求得之輿至闕下求見僕射王克領軍朱异勸開城納賊克等讓之涕泣而止賊復輿送莊嚴寺療之明年臺城不守琛逃歸鄉里其年賊寇會稽復執琛逸出以為金紫光祿大夫卒

劉峻字孝標父琨宋始興內史峻生暮月母携還鄉里宋泰始初青州陷魏峻年八歲為人所畧至中山中山富人劉實愍峻以束帛贖之教以書學魏人聞其江南

有戚屬更徙之桑乾齊永明中從桑乾得還後至荊州
戶曹參軍

陳徐陵弟孝克梁太清初起家為太學博士至孝遭父
憂殆不勝喪事所生母陳氏盡就養之道梁末侯景寇
亂京邑大饑餓死者十八九孝克養母饘粥不能給妻
東莞臧氏領軍將軍臧盾之女也甚有容色孝克乃謂
之曰今饑荒如此供養交闕欲嫁卿與富人望彼此俱
濟於卿意如何臧氏弗之許也時有孔景行者為侯景

將頗富於財孝克密因媒者陳意景行多從左右逼而迎之臧氏涕泣而去所得穀帛悉以供養孝克又剃髮為沙門改名法整兼乞食以克給焉臧氏亦深念舊恩數私致饋餉故不乏絕後景行戰死臧氏伺孝克於途中累日乃見謂孝克曰往日之事非為相負今既得脫當歸供養孝克默然無答於是歸俗更為夫妻

周豫玄宏正子也年十四與父俱載入東乘小船渡岸見藤花宏正挽之船覆俱溺宏正僅免豫玄遂得心驚

疾

後魏崔衡長子敞宣武初為鉅鹿太守弟肱之逆也敞為黃木軍主韓文殊所藏其家悉見籍沒唯敞妻李氏以公主之甥自隨奴婢田舍二百餘口得免正光中普釋禁錮敞復爵

崔玄伯初為苻堅著作佐郎堅亡避難於齊魯之間為丁零翟釗及司馬昌明叛將張願所留繫郝軒歎曰斯人而遇斯時不因扶搖之勢而與鸚雀飛沉豈不惜哉

賈彞初仕慕容氏歸垂為驃騎長史垂太子寶兵敗被
執道武即位拜尚書左丞甚見委用天賜末彞請詣溫
湯療病為叛胡所拘執送於姚興積數年遁歸又為屈
丐所執與語悅之拜秘書監卒太武平赫連昌子秀迎
其尸柩葬于代南

李孝祖祖敷以罪誅孝祖以年小藏免後敷妻崔氏得
出宮養之至平涼太守

陰道方為荊州刺史李神雋長流參軍正光末梁簡文

遣其軍主曹義宗等擾動邊蠻神僞令道方馳傳向新
野處分軍事於路為蠻所掠送於義宗義宗又傳致襄
陽仍傳於梁武梁武囚之尚方孝昌中始得還國

劉芳字伯友彭城人出後伯父宋東平太守遜之父邕
同宗劉義宣之事身死彭城芳隨伯母房逃竄青州會
赦免舅元慶為宋青州刺史沈文秀建威府司馬為文
秀所殺芳母子入梁鄒城慕容白曜南討青齊梁鄒降
芳北徙為平齊民時年十六後至太常

郭祚父洪之坐崔浩事被誅祚亡竄得免弱冠州主簿
刺史孫小委之書記又太原王希逸妻之以姪共相調
恤得以饒振後為征西將軍雍州刺史

楊藻為瀛州安東府長史以年老歸家闔門不關世事
孝昌中在鄉為賊帥杜洛周所囚發病卒

北齊王晞為大鴻臚開府儀同三司及晉陽陷敗與同
志避周兵東北走山路險迫懼有土賊而晞溫服膏梁
曾不廢行侶尤之晞曰莫尤我我行事若悔久作三公

矣

魏收初仕後為太學博士及爾朱榮於河陰濫害朝士收亦在圍中以日晏獲免

後周盧柔為賀拔勝大行臺郎中掌書記及孝武西遷東魏遣侯景襲穰勝敗南奔梁後與勝俱還行至襄陽齊神武懼勝西入遣侯景以輕騎邀之勝及柔乃棄船山行羸糧冒險經數百里時屬秋霖徒侶凍餒者大半幾至於死大統二年至長安封容城縣男

竇熾扶風人父峿平遠將軍魏正光末北鎮擾亂熾乃
隨畧避地定州因沒於葛榮榮欲官畧畧不受榮疑其
有異志遂留畧於冀州將熾及熾兄善隨軍永安元年
爾朱榮破葛榮熾乃將家隨榮於并州後至太傅

陸通少敦敏好學有志節父政為文帝行臺左丞原州
長史通幼從在河西遂逢寇難與政相失通乃自以東
歸從爾朱榮榮死又從爾朱兆及爾朱氏滅乃入關後
至大司馬

姚僧垣仕梁為湘東王府記室參軍侯景陷宮城逃歸
吳興俄而景兵大至攻戰累月郡城遂陷僧垣竄避久
之乃被拘繫景將侯子鑿素聞其名深相器遇因此獲
免後至上開府儀同大將軍

隋劉炫河間人為太學博士以品卑去任歸於河間于
時盜賊起穀食踊貴炫與妻子相去百里聲聞斷絕鬱
鬱不得志時在郡城糧餉斷絕其門人多隨賊哀炫窮
乏詣郡城下索炫郡官乃出炫與之炫為賊所將過下

城堡未幾賊為官軍所破炷饑餓無所依復投縣城長
史意炷與賊相知恐為後變遂閉門不納之時夜永寒
因此凍餒而死時年六十八其後門人諡曰宣德先生
唐李百藥初為隋建安郡丞及煬帝被弒展轉沈法興
李子通杜伏威軍中備嘗艱苦乃著省躬賦以致其情
及高祖遣使江南百藥說伏威迎之後復勸伏威令身
入朝渡江至歷陽伏威狐疑中悔將害百藥乃飲以石
灰酒因大洩痢而宿病皆除伏威知百藥不死乃書與

輔公柝令殺之賴王雄誕救護得免及公柝反署百藥
為吏部侍郎人有言百藥初說杜伏威不聽入朝今又
共輔公柝反高祖大怒公柝平趙郡王孝恭得伏威與
公柝令殺百藥書奏之高祖意乃稍解詔配涇州為司
戶

徐文遠初仕隋為國子博士時洛陽饑饉出城採樵為
李密所及密敗復歸王世克其子士會狂悖之人委棄
文遠西歸長安王世克大怒絕其廩食此後大饑將死

者數矣復因樵採遇羅士信候騎獲之送入京師復授國子博士

張玄素蒲州虞鄉人隋末為景城縣戶曹竇建德攻陷景城玄素被執將戮縣民千餘人號泣請代其命曰此人清慎殺之乃無天也大王將定天下當深加禮接以招四方如何殺之使善人解體建德遽命釋之署為治書侍御史固辭不受

高士廉隋時坐事謫為交趾朱鳶縣主簿尋屬天下大

亂王命阻絕太守丘和署為司法書佐郡丞元肅從橫
士也多所交結謀殺和而據駱越以窺天下之變見士
廉為時望所歸亦傾心推結憚其立操不敢以謀告之
然肅竟以事洩為和所族士廉坐與交通幾危矣和子
行淹保明之由是獲免及蕭銑敗高祖遣使徇嶺南武
德五年乃與丘和上表歸國追入特蒙顧待拜大將軍
路敬淳貝州臨清人也父文逸隋大業末闔門遇盜文
逸潛匿草澤晝伏於死人中夜行避難自傷窮梗閉口

不食同侶閔其至性勸以不當減性捨拾以食之遽負之而行遂免於難後至太子司議郎仍授崇賢館學士來濟隋左翊衛大將軍榮國公護子也字文化及之難闔門遇害濟幼逢家難流離艱險後至中書令

韋斌為太常少卿天寶五載右相李林甫構刑部尚書韋堅貶蒼梧太守七載又重貶江夏別駕堅兄弟四人並賜死於貶所姊惠宣太子妃隨子嗣薛王瑜遷於夜郎郡安置斌以親累貶巴陵太守後為銀青光祿大夫

天寶十四載冬安祿山反陷洛陽斌為賊所得偽授黃門侍郎

李彭年為馮翊太守玄宗幸蜀賊陷西京彭年沒於賊偽授工部侍郎彭年脅授偽官常憤歎忽忽不得志與韋斌相次而卒

王維為給事中安祿山陷兩京維在西京詐中風失瘖久之賊重其名追赴洛陽偽授給事中

崔器天寶末為奉先令逆胡陷西京器沒於賊仍守奉

先居無何屬賊兵同羅叛賊將安守中張通儒並避難
藏匿又渭上義兵起一朝聚徒萬人器恐懼憂惶先有
賊文榜符牒一時焚之榜名義師欲應渭上軍及通儒
出兵使擊渭上軍破賊將崔乾祐先頓蒲同使麾下騎
三十人捉器器遂北走靈武

李進為工部侍郎代宗初皇儲為天下元帥平河洛以
進參佐時元帥在陝兼統蕃兵迴紇恃功而驕敢恣狠
疾進與中書舍人韋少華皆為皮鞭所辱進數月病瘡

僅以全生

段秀實為安西節度荔非元禮判官邛山之敗軍徒翼城元禮為麾下所殺將佐亦遇害而秀實獨以智全

馬總字會元扶風人少孤貧好學性剛直不妄交遊貞元中姚南仲鎮滑臺辟為從事南仲與監軍使不叶監軍誣奏南仲不法及罷免總坐貶泉州別駕監軍入掌機密福建觀察使柳冕希旨欲殺總遣從事穆贊鞫總贊稱無狀總方免死後量移恩王傅

嚴懷志以涇原裨將隨渾城會吐蕃背盟懷志等陷沒居吐蕃中十餘年逃入以西諸國為所掠賣又脫走經十餘國至天竺占波國泛海而歸貞元十四年始至温州徵詣京師德宗以懷志處蕃久不欲令出外囚之仗內順宗即位乃釋之初懷志之陷父母俱存及歸父母皆沒妻嫁他人

呂溫者以小吏事崔漢衡貞元初吐蕃背盟漢衡為吐蕃所虜將殺之溫趨往以背受之亦吐蕃義之由是與

漢衡俱免及漢衡歸獨留蕃中吐蕃尚浮屠法温因求
為僧久之乃得歸亦以習吐蕃事囚焉順宗即位得釋
與懷志授中郎將

魏義通為黔中觀察使行至涪州泝灘舟壞沉失其所
持節及賜馬

梁張雋字彥臣祖父咸有聞於時雋少孤雅自修飾善
為五言詩其警句頗為人所稱廣明中黃巢犯京師天
子幸蜀士皆竄伏窟穴以保生雋亦晦跡浮泛不失其

道後至兵部郎中監錢判官

後唐劉岳初少孤以先人官卑羣從之間最不調兩都喪亂流寓青齊丐食業文厲心苦節後至太常卿

趙鳳幽州人也少為儒天祐中燕帥劉守光與太原爭霸率十夫團為軍伍而黥面為文儒者患之多為僧鳳亦落髮與遊方者雜處後為相終

朱宏昭為文思使與安重誨情不協故罕得居內任天成二年秋以李嚴為西蜀監軍乃用宏昭為東川副使

嚴至成都為孟知祥所害宏昭懼求還京師董璋待之
雖厚而嘗猜防伺察宏昭坦懷從命而璋不疑尤重之
會有軍事雖論列乃令宏昭入覲偽辭之不獲蹠是免
禍後為襄州節度使襄州留軍有朽腐甲冑數百宏昭
奏不堪完補詔投之於漢水詔至宏昭集賓佐棄之登
南城依却敵以視無何懸鐘格木朽墮宏昭至城璋絆
之於木左右梯而下之幸無損但喪魄讐氣而已

晉趙瑩為相開運末虜陷京城瑩從少帝於北塞周太

祖遣尚書左丞田敏報命于契丹遇瑩于幽州瑩得見
華州人悲悵不已謂田敏曰老身漂零寄命於此近聞
室家喪逝弱子無恙蒙中朝皇帝倍加存卹東京舊第
本屬公家亦聞優恩特給善價老夫至死無以報效於
是南望稽首涕泗橫流先是漢初以晉入蕃將相第宅
賜隨駕大臣以瑩第賜太祖太祖召瑩子前刑部郎中
易則告之曰所賜第除素屬版籍外如別有契券已所
置者可歸本直即以千餘緡遺易則易則惶恐辭讓太

祖堅之乃受故瑩言及之未幾瑩卒於幽州瑩初被病遣人祈告于虜主願歸骨於南朝使羈魂幸復鄉里虜主聞而許之及卒遣其子易從及家人數輩護喪而還仍遣大將送至京師太祖聞瑩死于異域而知夷狄亦不能違物性歸其喪極感歎久之仍賜其子絹五百疋以備喪事令歸葬于華陰故里

華溫琪年始二十長七尺餘唐廣明中黃巢為亂掠為紀綱從巢南犯交趾西陷長安偽署溫琪供奉都知官

既得志習平時官者故態每肩舁出入以自奉及巢敗奔至滑臺以形貌魁岸懼不自容乃投白馬下流俄而浮至淺處會行人救免又登桑自經枝折墜地不死至夜昨縣界有田父見溫琪非常人也遂匿於家經歲餘漢龍敏初唐莊宗平河維徵為司門員外郎以家貧乏養求為興唐少尹踰年丁母喪退居鄴下會趙在禮據鄴城以敏鄉人強起令署事又為亂軍所迫敏不敢拒明年在禮鎮浮陽敏復居喪制


周馮道唐天祐中劉守光辟為幽州掾嘗以利害箴守
光守光怒寘於獄中後仕晉為相晉末北虜犯闕迴虜
先留馮道與李崧和凝文武官等在常山以閏七月二
十九日虜中有偽詔追崧令選朝士十人赴木葉山行
事虜帥解里召道等至帳前所欲諭之崧偶先至見其
舌懼形於色解里將以明日與朝士齊遣之崧乃不候
道與凝先出既而相遇帳門之外因與分首俱歸俄而
李筠等縱火與虜交關鉞槊相及是日道若齊至與解

里相見稍躊躇則悉為俘矣時論者以道在布衣有至行立公朝有重德其陰報昭感多此類也

劉皞初自魏博歸于唐莊宗梁將劉鄩自梁欲乘虛襲太原軍至樂平時皞客於縣舍為鄩軍所俘髡其髮謝彥章許之知其學儒禮之謂其鄉人劉去非曰為公得一宗人令皞見之去非詢其爵里乃親族也對泣久之自是隨去非客于彥章門下後至衛尉卿

安叔干為太子太師叔干以都城內難之際軍士未戢

其家財無孑遺大遭笞捶以是成疾請歸雒都卒
王繼宏為河陽節度使少無賴為吏所拘械繫常州獄
將殺之會赦以其壯健特宥之配於本軍



冊府元龜卷九百四十